

VARTALAP

Sorkar laipui Ministry of Information & Broadcasting hnuaia Press Information Bureau (PIB), Aizawl chuan vawiin khan Serchhip Press Club-ah chanchinbumite leh khawtlang hruaitute pualin 'Viksit Bharat - Guarantee for Razgor and Ajeevika Mission (Gramin) Act 2025' leh 'PM Vishwakarma Scheme' zirhona a buatsaih.

He hun hi Serchhip District Addl DC Pu Lalrinzuala chuan khuallian niin a hmanpui a, PIB chu hun rei tak chhung sawrkar laipui hmalakna pawimawh hrang hrang hriatna pawimawh tak a ni thin a ti a, Vartalap kaltlangin central scheme chu mipuiten an hriat theih phah a beisei tih sawiin hmalakna hrang hrang chu mipuiten an hlawk pui ngei theih nana zirtir an nih theih nan a puangdarh tu ten hriat a pawimawh a ti a, District khawpui mai ni lo hmun kilkhawr thleng phak a nih theih nan theihtawp chhuah a tul a ti a, sawrkar bakah tlawmngai pawl hrang hrang ten tan lak tel a ngai tih sawiin tanrual a pawimawh tih a sawi.

Addl DC chuan sawrkar laipui scheme a nih angin mipui ten a chipchiar taka an hamthatna tur hrang hrang an hriat theih nan puan chhuah tam a pawimawh a ti a, scheme hrang hrang chu Mizoramah hlawhtling tak kalpui a nih theih nana mi tin tanrual a ngaih thu a sawi bawk.

Press Information Bureau hotupa Dr. Rajeev Lourembam chuan, sorkar laipui scheme pawimawh pahnihte chu khawpui atanga thingtlang kilkhawr thlenga cheng ten Chiang zawka an hriat theih nan zirhona chu buatsaih a nih thu a sawi a; zirho tur scheme chu mipui ten an tangkaipui ngei a beisei thu a sawi.

Wawiina hun hmanah hian Serchhip Joint VC, MHIP leh Sub. Hqrs YMA hruaituten thu an sawi a; chawhnu lamah Serchhip ARDO Pu Stephen Lalhlansanga Auhmun chuan G-RAM-G Act, 2025 chungchang a sawifiah a, Serchhip Commerce & Industries Dept atangin Pi C. Vanlalhriatpuii PM Vishwakarma Scheme chungchang kalkhawmte a zirtir bawk.

Media Workshop 'Vartalap' ah hian Mizoram Journalist's Association Aizawl leh Serchhip bakah Serchhipa YMA leh MHIP hotute an tel a, mithiamte hnen atanga sawrkar laipui scheme sawi ho a nih bakah zawhna leh chhanna hun hman a ni.



CHAPCHAR KUT

Kumin Chapchar kut chu kar khat chhung hman tura ruahman a ni a, vawiin khan Chief Minister Pu Lalduhoma kaihhruaiin Chapchar Kut 2026 Organising Committee te chu an thukhawm a ni.

CM Conference Hall-a hun hmanah hian, kum 2026 Chapchar Kut programme kimchang an duang fel a. March ni 9, Thawhtanniah Kut puala tlan (Kut Run) neia kut lawmna bul tan tur a ni a. He tlan (run) pual hian kum dang ang bawkin Central YMA-in anmahni sensovin T- shirt a lo buaipui leh ang.

A lawmna pui ber hi March ni 13 Zirtawpniah Lammualah neih tur a ni a, darkar ruk chhung a awh ang. Chief Minister Pu Lalduhoma chu Kut Pa a ni ang a, Art & Culture Minister Pu C. Lalsawivunga chu kut thlengtu a ni ang. Bawlhhlawh hnutchhiah lo Kut (Garbage Free Kut) kalpui tum a ni.

Kum 2026 Chapchar Kut thupui atan hian "Zo nun ze mawi - Inremna" tih chu committee hmasa lamah lo thlan fel tawh a ni. Kumin atang hian Chief Minister chawimawina Nopui sem a ni tawh dawn a. Nopui dawngtlaka ngaih rawtna hrang hrang lut zing atangin a tum khatnaa dawngtu turte chu wawiina committee hian an thlang a ni. Chief Minister Nopui hian pawisa fai Rs. 1 lakh, Citation leh Memento te a keng ang.



TAX REFORM

Sorkar laipuiin Income Tax bikah Tribal area a cheng Tribal mite a awl avangin chhiah zawng zawngah a awl vek tihna a ni lova, chhiah lak dan inlumlet chho zel chu Mizote'n an ngaihven a tul hle tih mithiamte'n an sawi.

He thu hi Akashvani Regional News Unit Aizawl-in a kawmnaah sawiin, Dr. Vanlalmuana chuan India ramah chhiah lak dan system lianpui pahnih-Direct Tax leh Indirect Tax a awm a ti a, Direct Tax chu hlawn (salary), sumdawna leh thiam bik thil (profession) atanga pawisafai lakluh atanga chhiah pek ngai a ni a, Income Tax Act dan hnuaiah Tribal mi, notified Tribal area atanga pawisa a thawhchhuah te chu chhiah awl an ni a, hei hi Mizote pawhin chhiah an awl chhan a nih thu a sawi a, kumin April ni 1 atanga hman tan tur Income Tax Act 2025 hnuaiah chuan crypto

currencies an tih token assets an tih te a huam chho dawn a, Act hmasa hnuaia thil khirkhan te pawh awlsam hnuaia dah a ni tawh dawn bawk a ti a, Indirect Tax chu mipuiten mamawh chi hrang hrang an lei atanga a zuartu kaltlanga chhiah hrang hrang sorkarah an chhung ve thin a ni a ti a, ram danga bungraw lakluh leh thawnehhuah atanga chhiah lak - Custom Duty, tuialhthei leh zu lama state sorkarin exise duty a lak tih loh chhiah lak dan hlui, state chhunga bungraw siam leh leia chhiah lak-VAT, state leh state inkara central sales tax, service tax, entertainment tax te chu bungraw siam chhuahna bika excise duty lak thin te chu luankhawm tirin, Goods and Services Tax (GST) ah siam a ni tih a sawi bawk a ni.

Dr. Vanlalmuana chuan chhiah lak dan hlawm hnih chuan Mizote pawh a huam vek a, Income Tax bikah Tribal area a cheng Tribal mite a awl avangin chhiah zawng zawngah a awl vek tihna a ni lo tih hriat reng a tha a ti a, nakinah Sorkar laipuiin chhiah lak dan hrang hrang thar a siam hun te a awm dawn a, Mizote a nghawng dan pawh a inang lo thei a, chhiah lak dan inlumlet chho zel chu Mizo ten an mawhphurhna a ni tih hre reng a an ngaihven a tul hle tih a sawi a ni.



LAWNGTLAI DC

Lawngtlai Bawrhsap Pu Donny Lalruatsanga hovin nimin khan DC Conference Hall-ah an District chhunga dan lo a lo lut leh Sumdawnna, Trading (Marketing) chungchang consultation meeting neih a ni. Consultation meeting-ah hian Inter-District Joint Meeting neih nise tih a ni a, Surprise checking of illegal Immigrants (undocumented) neih nise tih a ni bawk.

